

***Su Comunu de Baressa at
pentzau de incumentzai su
servitziu de Novas Baressesas***

A incumentzai de su mesi de Cabudanni de su 2011, su Comunu de Baressa at pentzau de apariciai po tzitadinus su servitziu de *Novas Baressesas*.

Est a nai unu servitziu de informatzioni istitutzionali po mesu de una newsletter periòdica aprontada de s'operatori de s'Isportellu Linguisticu comunali. Custu follieteddu informativu bolit agiudai a afortiai sa comunicatzioni intra de su Comunu e is tzitadinus po chi issus siant sèmpiri informaus de is ainas de s'Amministratzioni comunali e de is iscadèntzias prus importantis, e in manera de giai puru visibilitadi pùblica e ufitziali a su sardu, lingua ancora bia in sa comunidadi nostra, ma fueddada su prus in situatzionis de comunicatzioni informalis e pagu in cuntustus ufizialis. S'Amministratzioni bolit fintzas arregordai a is tzitadinus chi tenint prexeri de s'aballiri de su servitziu de s'Isportellu de sa lingua

sarda comunali, ca si podint ponni in cuntatu cun s'operatori po tèlefonu o benendi inderetura in Comunu me is diis e is oras inditadas in fatu.

Novas Baressesas in domu !

Novas Baressesas at a bessiri prus o mancu una borta a su mesi e s'at podi arriciri inderetura in domu, cun una e-mail: bastat a ddu pediri mandendi una punta de billetu eletrònicu a s'indiritzu

serviziocultura@comune.baressa.or.it

iscriendi su nòmini, su sangunau e "bolu arriciri *Novas baressesas*". In prus, s'at podi ligi puru in sa bacheca comunali o agatai in medas atividadis comercialis de sa bidda o in sa biblioteca comunali



Comunu de Baressa

Provintzia de Aristanis

Sa redatzioni de *Novas Baressesas* est contivigiada de su Servitziu linguisticu sardu de su Comunu de Baressa.

S'isportellu linguisticu est a disponimentu de tzitadinus, maistus de iscola, professoris e istudentis po cali si siat informatzioni, profundamentu, duda, crosidadi, bibliografia, sitografia asuba de sa lingua sarda, po consulèntzias didàticas e po contzillus chi pertocant is arrègulas de iscrivura de su sardu.

Su Servitziu est abertu po su mesi de Cabudanni:

	de	a
Cenàbura 02	9.35	14.05
Giòbia 08 e 22	9.35	14.05
	14.20	16.20



Comunu de Baressa

Provintzia de Aristanis

Novas Baressesas

☎ 0783-930049 Fax 0783-930118
e-mail: info@comune.baressa.or.it

Newsletter periòdica de informatzioni istitutzionali de su Comunu de Baressa

**Responsabilitadi e proprietadi de su
Comunu de Baressa (or)**


Annu I, n. 1

Acabbau s'otu de Cabudanni de su 2011

Su sardu est una lingua fueddada de su 68,4% de is sardus

Avisus de ispetàculus e de atividades

Festa de sa Mèndula bintesima annada



S'informat sa popolatzioni ca **Sàbudu 10 de Cabudanni de su 2011** at a incumantzai sa bintesima annada de sa Festa de sa Mèndula apariciàda de su Comunu de Baressa cun custu programa:

Sàbudu 10 de Cabudanni faci'oras de is tres de meri, inghitzu de sa Fèsta de sa Mèndula in totu su Tzentru istòricu de sa bidda cun *stand* de ammostu e bendidura de cosas de papai e bufai, butegas de is artis, ammostu de ceramicas, cadinus e iscateddus. C'ant a essi puru s'Ammostu naturalisticu de s'Enti Forestas e bisitas a sa Domu museu, a sa crèsia manna de Santu Girorgi e de su Museu de s'Arti sacra.

Faci'oras de is ses e mesu (18.30) c'at a essi sa sfilada de is màscaras de sa traditzioni sarda cumentu a *Mamutzones Antigos* de Samugheo, *Su Bundu* de Orani, *su Corongiaiu* de Laconi.

Dominigu 11 de Cabudanni de is noioras a sa una de mengianu (9 -13) e de is cuatru a is noioras de meri (16 – 21) ant a torrai a aberri is *stand* de ammostu e bendidura de cosas de papai e bufai, is butegas de is artis e is bisitas a is monumentus de sa bidda.

De is cincu e mesu a is otu de meri (17,30 - 20) ant a sfilai e baddai is grupus bistidus a costumu sardu de Sant'Isidoru de Baressa, de su bixinau de Villanova de Casteddu, de Sanluri, de Santa Justa de Uta e de Benetutti; sèmpiri a su meri de is cincu e mesu (17,30) c' at a essi sa rapresentada de su traballai sa mèndula in s'antigòriu, po ddu nai in àterus fueddus de "sa scudidura", "s'arregorta", e de "sa scroxiadura".

Faci'oras de is ses (18,00) s'at fai biri cumentu si faint is druxis de mèndula e apustis (18,30) s'ant a tastai totus impari.

A is otu e mesu de meri (20,30) ispetàculu etnico - musicali presentau de su grupu

Bandelas cun Giordana Dessì e Lunabonita.

Pìndulas de lingua sarda

Dònnia nùmeru de Novas Baressesas at a essi integrau cun curiosidadis asuba de sa lingua sarda, chi podint pertocai is nòminis de logu, contixeddus o arregordus de is bècius de sa bidda asuba sa vida chi si fadiàt in àterus tempus, s'etimologia de is fueddus de su sardu, sa gramàtica e is arrègulas de arriferimentu bogadas de sa Regioni sarda cun sa deliberatzioni n° 16 de su 2006, nomonada Limba Sarda Comuna.

Sa parti prus manna de is linguas chi benint de su latinu faint su plurali de is nòminis concretus e chi si podint contai candu cussus tenint unu significau genèricu.

Esèmpiu: in italianu: "*Vorrei delle pesche o un chilo di pesche*".

Su sardu, a s'imbressi, tenit su singolari in su logu de su plurali cun is nòminis de fruta, boboeddus e animalis candu custus tenint unu significau genèricu o candu funt acumpangiaus de unidadi de misura.

Esèmpius: "*A papai ddui at pisci*", "*Giaimi unu chilo de prèssiu o prèssaba*".